

乾隆大藏經



乾隆大藏經



御製

佛光恩照三千大千
恒沙法界普度衆生
身心安泰年時豐稔
日月升恒乾坤清寧
上下樂利中外協和
萬善圓成情與無情
大清雍正十三年四月初八日
隨緣徧滿
悉證菩提
風雨調順
百昌蕃熾
庶物咸亨
同登正覺

第九九冊 諸宗部此土著述(三三三)

御選語錄 四〇卷(卷一至卷四〇)

清世宗御錄……………一

御錄宗鏡大綱 二〇卷

清世宗御錄……………六六三

御錄經海一滴 二〇卷

清世宗御錄……………九九一

御選語錄



清刻龍藏佛說法變相圖

御製序

雪竇徧參諸方機辯無敵忽遇智門兩度拂
子驀口打豁然開悟乃嗣智門學者於此薦
得當知心不在思維而普照法界口不必語
言而遍演恒沙如雪竇云直饒乾坤大地草
木叢林盡爲衲僧異口同聲各置百千問難
也不消長老一彈指便乃高低普應前後無
差也雖然一彈指中隨緣自結如三十三天
共食寶器隨其福德而飯色不同故經云一
切賢聖皆以無爲法而有差別一彈指尚且
如是况乃有答有問有字有文豈得顚預渾
同無復選擇昔年雪竇眉毛拖地留此葛藤
今日圓明解髻探珠蛇足一上茲編也皆是
第一義諦最上宗乘學者不假外求直下自
證則不離此言句而皆有從凡入聖之機譬

如以火銷氷氷釋於水水氷一味得無所得
火水殊途有何交涉然而火力銷氷其功曷
可誣歟

雍正十一年癸丑七月朔日

御選語錄卷第十一

正智明覺雪竇顯禪師語錄

上堂

師在萬壽開堂日白槌畢師云宗乘一唱三藏絕詮祖令當行十方坐斷其有達士不避死生眨上眉毛出衆相見問人天普集佇聽雷音學人上來乞師垂示師云十萬八千不是遠進云恁麼則大衆露恩也師云後五日看問師唱誰家曲宗風嗣阿誰師云分明記取進云恁麼則昔日智門今朝和尚師云有甚麼交涉問如何是和尚爲人一句師云量才補職學云謝師方便師云自領出去師乃云一問一答總未有事在直饒乾坤大地草木叢林盡爲衲僧異口同聲各置千百問難也不消長老彈指一下並乃高低普應前後

無差曠祖佛之妙靈廓天人之幽迹如是則何假覺城東際五衆咸居古佛廟前此時衆畢

師在杭州靈隱受疏了衆請陞座時有僧問寶座先登於此日請師一句震雷音師云徒勞側耳進云恁麼則一音普徧於沙界大衆無不盡咸聞師云忽有人問爾作麼生舉僧云三十年後敢爲流芳師云賺了也師乃云天下絕勝之覺場靈隱導師之廣座暫借卑僧陞陟實愧非材豈敢於五百員衲子前提唱佛祖抑揚古今銜耀見知恥他先作假饒說得天雨四華地分六震於曹溪路上一點使用不著何也行脚高士有把定世界函蓋乾坤底眼誰敢錯悞絲毫其知有者必共相悉

師到蘇州日僧俗迎在萬壽衆請上堂問向上一路于聖不傳和尚從何而得師云將謂是衲僧學云恁麼則大衆需思學人禮謝也師云龍頭蛇尾問選佛場開選許學人入選也無師云切忌點額學云恁麼則心空及第歸也師云堦下漢師乃云如天普蓋似地普擎有如是自在具如是威德誰不承恩誰不景慕過去諸聖於無量剎勤苦受盡所得秘要法門今將普示大衆不用纖毫心力各請一時驗取於此薦得便能永出四流高步三界其或不知則是諸人諱却

師初到院陞座僧問杖錫已居於此日請師一句定乾坤師云百雜碎進云恁麼則海晏河清去也師云非公境界問如何是佛法大意師云龍吟霧起虎嘯風生問如何是祖師

西來意師云山高海濶進云學人不曾師云緊悄草鞋師乃云未來翠峰多人疑著及乎親到一境蕭然非同善財入樓閣之門暫時敘念莫比維摩掌中世界別有清規冀諸人飽足觀光以資欣慰

上堂僧問如何是實學底事師云針劄不入進云乞師方便師云水到渠成問如何是教外別傳一句師云看看臘月盡學云恁麼則流芳去也師云瘞子喫苦瓜問言迹之興異途之所由生不犯鋒鏑請師道師云誰家無白月清風進云還當也無師云土上加泥漢帥乃云劍輪飛處日月沉輝寶杖敲時乾坤失色衆魔從茲膽裂千聖由是眼開其如二聽不圓震迅雷而莫覺孤根將敗需春雨以非滋致使凡聖岐分悟迷派列奔馳七趣汨

沒四流重業相纏無有休日爾諸禪德覲善
叅詳如人上山各自努力

上堂僧問古人借問田中事插鋤叉手意如
何師云人從陳州來不得許州信問古人道
有讀書人到來意旨如何師云且在門外立
學云請師相見師云任是顏回亦不通師乃
云立賓立主剗肉作瘡舉古舉今拋沙撒土
直下無事正是無孔鐵槌別有機關合入無
間地獄明眼衲子應須自看

上堂僧問古人一喝不作一喝用是否師云
是僧便喝師便棒僧無語師云謔我問古人
道有佛法處不得住無佛法處急走過意旨
如何師云氣急殺人僧擬議師云甚麼處去
也問只在目前爲甚麼再三不覩師云截耳
卧街僧云恰是師云令我攢眉問黑豆未生

芽時如何師云餒驢餒馬進云生後如何師
云透水透沙僧禮拜師云一似不齋來問功
巧諸技藝盡現行此事如何是此事師云諸
方榜樣進云莫便是學人會處也無師云有
頭無尾漢師乃云過去諸如來斯門已成就
放過一著現在諸菩薩今各入圓明兩重公
案未來修學人總被翠峰穿却鼻孔

上堂纔有僧出禮拜師云大眾一時記取者
僧話頭便下座

上堂云從天降下從地湧出南北東西一棚
俊鶻顧杼停機苦屈苦屈

上堂問答罷乃云映眼時若干日萬像不能
逃影質凡夫只是未曾觀何得自輕而退屈
師拈起拄杖云把定世界不漏絲髮還觀得
也無所以雲門大師道直得乾坤大地無纖

毫過患分只是轉句不見一色猶爲半提直得如此更須知有全提時節諸上座翠峰若也全提盡大地人並須結舌放一線道轉見不堪以拄杖一時趣下

師到靈隱衆請陞座僧問遠別翠峰丈室將屆雪竇道場如何是不動尊師云看風使帆進云恁麼則觀方知彼去去者不至方師云龍頭蛇尾問如何是祖師西來意師云點進云猶有者箇在師云三十年後進云與麼則翠峰今日瓦解冰消師云有些子師乃云莫是與上座相爭然則論戰也箇箇力在箭鋒相柱又須是箇特達漢始得若意根尚滯直須向前決擇所以長沙和尚道百尺竿頭坐底人雖然得入未爲真百尺竿頭須進步十方世界是全身僧舉問南泉百尺竿頭如何

進步泉云更進一步僧復問瓦官官云百尺竿頭用進作什麼僧不肯官便打師云大衆古人機變出在一時其間別有商量亦未言著且如雪竇今日再入靈隱也似百尺竿頭依南泉之言得進一步喜與大衆相見則十方世界一時周匝便下座

師到越州承天寺衆請陞座僧問學人不問西來意藏身北斗意如何師云拈頭作尾漢進云請師答話師云西天令嚴問有問有答賓主歷然無問無答時如何師云古路草漫漫進云若不上來馬知與麼師云利劍不斬死漢師乃云作者相見一撥一捺撩起便行若佇思停機卒摸索不著若言問在答處答在問宗箇箇依草附木問不在答處答不在問宗罕見頂上有眼諸人還薦得也無薦得

薦不得並是新雪竇之過且莫鈍致承天和尚

上堂僧問承師有言三更過鐵門意旨如何師云忠言不避截舌僧禮拜師云臨筌方覺取魚難問千山萬水穿雲去撥草瞻風事若何師云蹋破草鞋進云爲什麼如此師云人無遠慮必有近憂問如何是向去的人師云伊蘭樹下坐進云却來時如何師云白日繞須彌進云天上天下唯我獨尊師云二頭三手漢問承師有言釋迦老子出氣不得甚處論訛師云君子千里同風進云與麼則殃及子孫也師云素非鴨類師乃云諸禪德直饒文殊辯說認螢火爲太陽居士杜詞指魚目同明月所以雪竇尋常道威音王已前無師自悟是第二句還我第一句來若未能把定

要津不免奔馳南北

上堂因僧送拄杖上師師拈起成頌云清峻孤根別有靈勢含山水自分明提來勝得豐城劍報盡人間兩不平復云大凡以平報不平是義烈常準以不平報不平爲格外清規亦猶以智遣惑頗逢下士以智遣智罕遇作家要會兩不平麼諸人也沒量罪過雪竇也沒量罪過雪竇過自能檢責你者漆桶不打更待幾時以拄杖一時趁下

上堂云布袋裏盛錐子不出頭是好手復云大衆雪竇錐頭出也莫有傍不肯底禪客出來良久云諸人既乃縮頭且聽諸方檢責上堂云黃金爲地白銀爲壁釋迦老子不合向者裏肩師以拄杖撥一下云看看落爾諸人頭上

上堂拈起拄杖云物中眼眼中物十方如來同此起出還會麼瞎漢歸堂

上堂云直得動地雨華何如歸堂向火便卜座

上堂舉雲門大師云禪河隨浪靜山河大地不是浪師拈起拄杖云看者一處起千處百處沒觜一處息千處百處不識還會麼歸堂上堂云見一則瞎汝眼知一則翳汝眼翳生則天上人間瞎却則三頭六臂或若辯得許爾十字縱橫

上堂云大無外小無內半合半開成團成塊老胡既隔絕衲子多違背從他千古萬古長漫漫填溝塞壑沒人會以拄杖卓地一下云歸堂

上堂衆方集以拄杖橫按膝上云恁麼會得

瞎却天下人眼復拋下拄杖云救取一半便下座

上堂云似地擎山不知山之孤峻如石含玉不知玉之無瑕晝行三千夜行八百是我尋常用底拈放一邊爾諸人向甚處見盤山速道速道

上堂舉僧問趙州二龍爭珠誰是得者州云老僧只管看師云看即不無爭即不得且道扶者僧扶趙州

上堂善財別後誰相訪樓閣門開竟日間便下座

上堂云一華開天下春古佛爲甚麼不著便爾若透得救取天下老宿忽若有箇衲僧出來云和尚且自救也許伊是金毛獅子

上堂云國無定亂之劍四海晏清也不是分

外還有梯山入貢底麼

上堂云摩竭掩室計校未成毗耶杜辭伎倆俱盡還有人點檢得者兩箇老漢出頭不得處麼直饒覷透更有箇漢礙著以拄杖擊繩牀一下便下座

上堂云一塵一佛國一葉一釋迦德山何以卓牌於鬧市又云入林不動草入水不動波投子因甚麼脚下五色索透關底試辯看

上堂云世事悠悠不如山邱卧藤蘿下塊石枕頭者般底有甚用處喚起了打

上堂云一切法皆是佛法瞞瞞預預非爲止觀一切法即非一切法莽莽鹵鹵還同天鼓賞箇名安箇是立箇非向甚處見釋迦老子還會麼以拄杖卓地一下云各請歸堂

上堂云機輪轉處作者猶迷千眼頓開與君

相見

上堂云泡幻同無礙拈起拄杖云泡幻何處得來又擊一下云西天四七聖東土二三祖鼻孔眼睛總穿在者裏瞋睡漢歸堂

上堂云目前無法意在目前不是目前法非耳目之所到師拈起拄杖云夾山老子甚處去也何不出來百草頭與大眾相見又卓地一下云在者裏復云咄者野狐精縮頭去便下座

上堂僧問承和尚有言道士倒騎牛意旨如何師云泥人眼赤僧云不會師云有甚麼了期便下座

上堂云天得一以清地得一以寧衲僧得一無風浪起爾若辯得禍不入慎家之門上堂舉雪峰示衆云盡乾坤是箇解脫門把

手拽不肯入一僧云和尚怪某甲不得一僧云用入作什麼師云三箇中有一人受教在忽若總不辯明平地上有甚數便下座
上堂云窮諸玄辯若一毫致於太虛竭世樞機似一滴投於巨壑不如歇去好還會麼客亭不遠

上堂云萬法本閒而人自鬧國師走入露柱裏去也見麼見麼良久云出頭便死歸堂

上堂云欲得現前莫存順逆者裏叅見祖師了更買草鞋行脚三千里外也被雪竇穿却鼻孔

上堂云胡蜂不戀舊時窠好花不在枝上萎若是箇漢聊聞舉著剔起眉毛便行

上堂僧問如何是時節因緣師云瞋睡漢僧便喝師云詐惺惺復云譬若世界壞時大水

競作其間無量衆生或沒未沒互相悲號仰望蒼蒼皆云相救當爾之時四禪天人一見便高聲喝云咄哉衆生我預曾報汝令頻頻上來汝都不聽如今有甚麼救處乃拍手一下云歸堂

上堂云乾坤之內宇宙之間中有一寶挂在壁上達摩九年不敢正眼覷著如今衲僧要見劈脊打

上堂僧問如何是佛師云頭髻髻耳卓朔學云不會師云堪笑堪悲復云不著便也不奈何爾從江南江北來笠子下爲什麼拶破洛浦徧叅底

上堂云乾坤把定即不無爾作麼生是手擎日月底句又云周遊四天下道我知有須彌頂上著得幾人復云舉步已經諸佛刹是爾

草鞋踏破多少

上堂云不與一法作對便是無諍三昧或是箇漢聞我舉著悉能坐斷有甚麼難處雖然如此向後莫辜負人好便下座

上堂舉古人道明眼漢沒窠臼我且問爾各從德山臨濟下來棒喝向爾不能施語言向爾使不著我既如此汝合必然又作麼生露得箇消息令雪竇知爾是箇風不入底漢去便下座

上堂云糞掃堆上現丈六金身遇賤則貴赤肉團上壁立千仞遇明則暗鼻孔撩天底衲僧試辯雪竇爲人眼者

上堂云禪河隨浪靜定水逐波清若拄杖子是浪衲僧便七縱八橫忽乾坤大地是浪便見扶籬摸壁且道放行好把定好一日云春

雷已發陽鳥未啼迷身句即不問爾透出一字作麼生道

上堂云巢知風穴知雨靈利衲僧未可相許若問如何苦哉佛陀叅

上堂云種種幻化皆生如來圓覺師云住住三世諸佛是幻六代祖師是幻天下老和尚是幻復拈起拄杖云拄杖子是幻那箇是圓覺良久以拄杖擊繩牀一下云幻出大衆擬議師云者一隊漆桶總無孔竅以拄杖一時趯下

上堂云乾坤側日月星辰一時黑東西不辯南北不分底衲僧向甚處見雪竇

上堂僧問雪覆蘆華時如何師云點僧云恁麼則爲祥爲瑞也師云雨重公案復成一頌雪覆蘆華欲暮天謝家人不在魚船白牛放

却無尋處空把山童贈鐵鞭

上堂云汝等諸人盡是久經陣敵慣戰作家倚天長劍即不問你作麼生是袖裏藏鋒代云寡不敵衆又云彼此

上堂師云不得春風華不開箇箇道我會會即且置作麼生舉代云時人相師又云空劫已前徒指生空劫之後錯商量正當空劫時什麼人爲主代云本是將軍致太平

上堂天不能蓋地不能載衲僧坐斷如恒河沙闌市裏指出一箇來代云便捫傍僧

上堂云如來惟一說無二說穿却衲僧鼻孔換却衲僧眼睛即得若教我明破恐帶累你不是好人代云欲見其師先觀弟子

上堂云遠則照近則明你會也笠子拄杖拈放一邊入水見長人作麼生辯代云平出

上堂云若道得隔身句知你是箇了事人忽若總道不得我也知你親代云猛虎不食其子

示衆

有時云一切不是句賠却時人眼還有出得底麼

示衆云父子親其居尊卑異其位於衲僧分上是放開是捏聚或若辯得分半院與爾

一日云寶山到也須開眼勿使茫茫空手迴便下座

示衆云譬若二龍爭珠有爪牙者不得或有衲僧問既是有爪牙者爲什麼不得請大衆爲雪實下一轉語

一日云此大講堂洞開東方日輪昇天則有明曜中夜黑月雲霧晦暝則復昏暗戶牖之